

Glúin Nua 2020: TG4 Ábhar Gearrfhoirme

Ba mhaith le TG4 ábhar gearrfhoirme úr, nuálach agus siamsúil a choimisiúnú a mheallfaidh lucht féachana óg idir 16-34 bliain d'aois, le béim ar leith ar an aoisghrúpa faoi 25. Beidh an t-ábhar digiteach seo, a bheidh den luach léirithe is airde, cruthaithe go príomha d'ardáin TG4 ar líne (Seinnteoir TG4, Cainéal YouTube TG4, IGTV srl). Beidh an t-ábhar is feiliúnaí le craoladh ar chainéal teilifíse TG4 chomh maith.

Faoi stiúir agus faoi mheantóireacht na gcomhlachtaí léiriúcháin, is mian linn glúin nua scéalaithe a thabhairt chun cinn a bhfuil fíis ar leith acu don ábhar seo. Táimid sa tóir ar thallann úr idir stiúrthóirí, scríbhneoirí agus daoine nua ar scáileán a thabharfaidh fuinneamh agus dearcadh nua trí ábhar samhailteach a chruthú a spreagfaidh glúin nua de Ghaeil óga.

Ba chóir go mbeadh na smaointe nuálach, uaillmhianach, cruthaitheach agus dúshlánach i dtaobh ábhair, stíle agus cuir chuige de agus go mbeadh sé mar aidhm acu Gen Z a chur ag gáire, ag machnamh, ag argóint agus ag caint linn. Ní mór do gach coincheap oibriú go nádúrtha i nGaeilge agus iad a bheith léirithe go príomha dóibh sin a labhraíonn í go rialta. Ach táimid ag súil leis an ton, greann agus ábharthacht a bheidh ag an ábhar seo le go mbeimid in ann lucht féachana óg níos leithne a mhealladh agus a spreagadh i dtreo na teanga chomh maith.

Táimid ag lorg sraitheanna go príomha a bheidh idir 3-6 clár agus 2-10 nóiméad ar fhad, ach táimid sásta smaointí láidre le haghaidh scannáin nó cláracha aonair gearrfhoirme a bhreithniú chomh maith. Tá spéis ar leith againn sna seánraí seo a leanas:

- **GREANN/DRÁMAÍOCHT GHRINN:** Is féidir leis seo a bheith ina dráma a bhfuil script leis, sceitsí ardchaighdeánach, scigscannán fáisnéise nó eile. Táimid ag lorg ábhar gearrfhoirme atá ábharach don ghlúin seo agus a mbeidh fonn orthu é a roinnt lena chéile. Teastaíonn scríbhneoireacht chliste, ghéar, agus teolaí agus tá tallann den scoth ar an scáileán ríthábhachtach. Bí dána, bí spráil agus le bhur dtoil bain gáire asainn....
- **FAISNÉIS:** Sraitheanna nó scannáin aonair, cruthaithe don mhúnla gearrfhoirme, le scéalta láidre ábhartha agus carachtair/guthanna a rachaidh i bhfeidhm ar ár sprioclucht féachana. Tá muid ag iarraidh scéalta físiúla, barántúla, croíúla agus cruthaitheacha a thugann léargas ar an taithí saoil, ábhar spéise agus paisin atá ag an sprioclucht féachana. Scéalta a thabharfaidh dúshlán don méid a bhfuilimid ag súil leis, a chuirfidh ag smaoineamh muid agus a n-ardóidh ár gcroí. Cuimhnigh nach gá d'ábhar faisnéise a bheith dáiríre i gcónaí!
- **SIAMSAÍOCHT FHÍORASACH:** Táimid sa tóir ar smaointí nuálacha, ardaidhme le téamaí láidre agus tallann láidir atá paiseanta faoin ábhar. Is féidir leis a bheith ina shainshraith fhíorasach, formáid úr siamsúil nó gné nua chruthaitheach a thugann léargas ar leith ar an gceol, na healaíona, ar chúrsaí faisin, taistil, beatha nó treochtaí na linne.

Ní mór gach iarratas teacht ó chomhlacht léiriúcháin agus ní mór iad a chur ar aghaidh go leictreonach ar shuíomh eCoimisiúin TG4 roimh **Dé hAoine an 18 Meán Fómhar 2020**. Mura bhfuil an comhlacht cláraithe, caithefear clárú ar dtús ar an suíomh <http://update.tg4.ie/ecommerce/login.php> agus an t-iarratas a uaslódáil roimh an sprioc-am tríd an rogha, 'Ábhar Ghearrfhoirme Glúin Nua', ón roghchlár anuas. Tá sé i gceist

againn seisiúin cur i láthair a dhéanamh faoi dheireadh mí Mhéan Fómhair agus tograí a chur go conradh go luath ina dhiaidh sin.

BA CHÓIR NA NITHE SEO A LEANAS A BHEITH LE GACH IARRATAS:

- Iarratas ina bhfuil ábhar, cur chuige cruthaitheach, ton, agus stíl físiúil san áireamh ann.
- Conas agus cén fáth a mheallfaidh an smaoineamh seo an sprioclucht féachana; cén fáth an bhfuil an t-ábhar agus cur chuige ábhartha agus conas a rachaidh sé i bhfeidhm ar dhaoine?
- Digiteach: Cén tuiscint agus taithí atá ag an bhfoireann ar ábhar digiteach a chruthú; cén t-ardán is fearr don tsraith seo chun an sprioclucht féachana a aimsiú agus cén t-ábhar breise a bheidh á chruthú chun poiblíocht trasardáin a dhéanamh ar an tsraith/clár?
- Conas a dtabharfar faoi stíl fhísiúil ar leith a thabhairt don ábhar seo i ndáil le taifeadadh, eagarthóireacht, grafaicí, íomhánna, thumbnails srl.
- Eolas ar an bhfoireann chruthaitheach léiriúcháin, lena n-áirítear an tallann úr (stiúrthóir, scríbhneoir, tallann ar scáileán srl) a bheas ceangailte leis an togra seo. Is gá mar a dhéanfar an tallann nua seo a fhorbairt agus an cineál meantóireachta a bheidh á thabhairt dóibh mar chuid den phróiseas léirithe a thabhairt le fios. Fáiltimid roimh thallann láidir chruthaitheach mná ach go háirithe sa bhabhta seo.
- Buiséad iomlán agus sceideal seachadta an togra. Beimid ag súil le buiséad idir €600-1000 an nóiméad (anuas ar chostaisí mheantóireachta) ar an ábhar seo ag brath ar sheánra, scála agus uailmhian an togra.

Tá tacaíocht arb fhiú €240,000 í faighte ag an gciste seo ó chomhpháirtíocht idir TG4, Údarás Craolacháin na hÉireann, Ciste Craoltóireachta Gaeilge Scáileáin Thuaisceart Éireann (ILBF) agus Údarás na Gaeltachta agus i gcomhar le Gréasán na Meán Skillnet agus é mar aidhm leis tacú le tallann nua sa tionscal.

GLÚIN NUA : le tacaíocht maoinithe ó:



Agus i gcomhpháirt le:

